

四大教法

《長阿含遊行經》卷三

爾時，世尊於菴婆羅村，隨宜住已。

佛告阿難：「汝等皆嚴，當詣瞻婆村·撻茶村·婆梨婆村及詣負彌城。」對曰：「唯然。」即嚴衣鉢，與諸大眾侍從，世尊路由跋祇漸至他城，於負彌城北，止尸舍婆林。

佛告諸比丘：「當與汝等說四大教法。諦聽、諦聽。善思念之。」諸比丘言：「唯然。世尊。願樂欲聞。」

「何謂為四？(1) 若有比丘作如是言：『諸賢。我於彼村·彼城·彼國。躬從佛聞。躬受是教。』從其聞者，不應不信，亦不應毀。當於諸經推其虛實，依律·依法究其本末。

若其所言非經·非律·非法。當語彼言：『佛不說此。汝謬受耶。所以然者。我依諸經·依律·依法。汝先所言。與法相違。賢士。汝莫受持。莫為人說。當捐捨之。』

若其所言依經·依律·依法者。當語彼言：『汝所言是真，佛所說。所以然者。我依諸經·依律·依法。汝先所言。與法相應。賢士。汝當受持。廣為人說。慎勿捐捨。』

此為第一大教法也。

(2) 復次。比丘作如是言：『我於彼村·彼城·彼國。和合眾僧·多聞耆舊。親從其聞。親受是法·是律·是教。』從其聞者。不應不信。亦不應毀。當於諸經推其虛實。依法·依律究其本末。

若其所言非經·非律·非法者。當語彼言：『佛不說此。汝於彼眾謬聽受耶。所以然者。我依諸經·依律·依法。汝先所言。與法相違。賢士。汝莫持此。莫為人說。當捐捨之。』

若其所言依經·依律·依法者。當語彼言：『汝所言是真，佛所說。所以者何。我依諸經·依律·依法。汝先所言。與法相應。賢士。汝當受持。廣為人

說。慎勿捐捨。』

此為第二大教法也。

(3) 復次。比丘作如是言：『我於彼村·彼城·彼國。眾多比丘持法·持律·持律儀者。親從其聞。親受是法·是律·是教。』從其聞者。不應不信。亦不應毀。當於諸經推其虛實。依法·依律究其本末。

若其所言非經·非律·非法者。當語彼言：『佛不說此。汝於眾多比丘謬聽受耶。所以然者。我依諸經·依律·依法。汝先所言。與法相違。賢士。汝莫受持。莫為人說。當捐捨之。』若其所言依經·依律·依法者。當語彼言：『汝所言是真，佛所說。所以然者。我依諸經·依律·依法。汝先所言。與法相應。賢士。汝當受持。廣為人說。慎勿捐捨。』

是為第三大教法也。

(4) 復次。比丘作如是言：『我於彼村·彼城·彼國。一比丘持法·持律·持律儀者。親從其聞。親受是法·是律·是教。』從其聞者。不應不信。亦不應毀。當於諸經推其虛實。依法·依律究其本末。

若所言非經·非律·非法者。當語彼言：『佛不說此。汝於一比丘所謬聽受耶。所以然者。我依諸經·依法·依律。汝先所言。與法相違。賢士。汝莫受

持。莫為人說。當捐捨之。』

若其所言依經·依律·依法者。當語彼言：『汝所言是真，佛所說。所以然者。我依諸經·依律·依法。汝先所言。與法相應。賢士。當勤受持。廣為人說。慎勿捐捨。』

是為第四大教法也。



悟因長老尼提點

所有的生活、職業、求學、奉獻，都要記住：我們是來修道的，人生就是這麼一條路，而且相續綿延不斷。

當看到恆河的水，就想起佛陀的智慧，法水傳衍，給人類、所有的生物、所有的世間，提供希望、光明。縱使日復一日、年復一年，我們是有所依的。